



Rabu, 23 Agustus 2023
Ogen: Job 11:17



"Ersinalsal desken Matawari"



“Kegeluhendu jadi terang, terangen asa las matawari sanga pantek ciger, janah paksa-paksa kegeluhendu si gelapna kal, jadi ersinalsal desken matawari mbincar erpagi-pagi”.

Lit 3 hal si perlu si pergermetken arah ayat enda; e me si cetak tebal: kegeluhendu jadi terang; paksa-paksa kegeluhendu si gelap ras ersinalsal desken matawari. Kegeluhen si terang banci jadi erkiteken perkuah ate ras keleng ate Dibata nandangi kita. Kegeluhen e terang erkiteken Dibata si erbahanca terang. Tanda-tanda kegeluhenta terang teridah arah perbahanen si mehuli, teridah arah nampati kalak si medanggal baban geluhna, teridah arah pengerananta, teridah arah lagu langkahta si teptep wari bage pe teridah arah pendahinta si mehuli. Dibata nalihken kegeluhenta ibas paksa-paksa si gelap nari ku bas kegeluhen si terang.

Kai kira-kira sierbahanca maka Dibata nalihken kegeluhenta si gelap ku bas kegeluhen si terang? Kai tujunna maka i salihken Dibata si e? Perban hebatna nge ndia kita, perban jagona nge, perban ulina nge entah perban untung Dibata adi isalihkenna kegeluhenta si gelap e ku bas kegeluhen si terang? Tentuna labo perban si e ndai kerina; tapi tujun Dibata maka isalihkenNa kegeluhenta e, gelah sigejapken dengen siangka maka adi labo perbahan Dibata kita enda labo kai kel pe.

Dibata nggo nalihken kegeluhen si gelap ku kegeluhen si terang; Dibata nggo mpelambarui kegeluhenta; e maka nina Dibata man banta: “Ersinalsal desken Matawari”. Ertina si pakekenlah geluhenta bagi anak-anak terang. Nerangi kegeluhen kalak si tading denga bas kegelapen; nerangi kegeluhen kalak si lit denga i bas kepicareten. Selaku anak-anak terang arus min encidahken kegeluhen si mehuli, mereken contoh si payo dengen nuduhkan dalam kempak kebenaran Dibata. Ersinalsal min terang kegeluhenta guna nerangi kegelapen.

“Terangi kegelapen alu sinalsal keleng ate”